

FAUNA

## Uciei nteressanc y reres

*L prim falch dla regina per l Südtirol y truep d'autri uciei reres, la prima coa dla gran marelà y dl granelin grisc y scialdi deplù tl rendicont ornitologich dl ann 2022. L presidënt dla lia provinziela di uciei, Iacun Prugger de Urtijëi, nes conta velch deplù*

L segundo rendicont dl ann cun duc i highlights dl mond di uciei de Südtirol ie uni dat ora. L se trata de n cudejel cun duta l'usservaziuns nteressantes de uciei fates tl 2022. L prim rendicont ie unit ora l ann passà cun l'usservaziuns dl 2021. Chëst ann vëniel leprò nce na lista de uciei manco reres, coche per eejëmpl la rondula o l cuch, y l prim y l ultimo iede che i ie unii udui ntan i ultimi ani d'ansciuda y d'autonn, canche i vën dal'Àfrica y se n va inò. Nsci pössen paredlè danter i ani y nce tl dauni, per cialé sce l ie vëira che i uciei vën dant d'ansciuda o se n va plu tert d'autonn.

La lia provinziela per la nrescida y la defendura di uciei, n curt AVK, à dat ora chisc doi cudejiei. L sotscriit Iacun Prugger de Urtijëi ie l presidënt, Thomas Stuffer de Soplaies fej l cassier y Thomas Delazer de Urtijëi l revisëur di conc. Perchël pössen di che l ie mpo mpue de spirt ladin tla lia. L letorat de chisc doi libri à fat Maria Insam y Sara Pellegrini, tramedoves professëures tl Lizeum d'Ert Cademia a Urtijëi.

Pra uni sort rera iel tl cudejel n pitl test che spiega velch n con' dla situazion de chësc ucel tl Südtirol, y l ie nce for leprò i inuemes per ladin gherdëina. L vën uni tant paredlè cun d'autri ani o nce cun usservaziuns storiches.

Da auzé ora iel tl 2022 l prim falch dla regina (Eleonorenfalke) per la provinzia, la terza »Falkenraubmöwe«, ududa tl raion de Setsass via tla Val Badia, l nona pitla marelà (Zwergsäger), la quarta becacia de mer (Austernfischer), l sesto udlon (Triel) y truepa outra rariteies coche l falcon dla stepa (Steppenweihe), l pitl rivarel (Zwergstrandläufer) o la becacia mesana (Doppelschnepfe).

Nteressant ie nce l fat che doi sortes à per l prim iede tla storia fat coa y trat su pitli te Südtirol: la gran marelà (Gänsesäger) y l granelin grisc (Grauammer).




L pitl becacin (Zwergschnepfe) se ascuend for y l ie rie a l udëi.

Foto: Stephan Kusstatscher




L pietbrum (Blaukehlchen) vëijen dantaldut d'ansciuda, nce te Gherdëina sce n cëla avisa.

Foto: Sepp Gamper



L carmin-chimpl (Karmingimpel) fej te duta la Talia mé coa tla Val Venüesta.

Foto: Roberto Maistri



L pitl pëcalën (Kleinspecht) ie l mënder pëcalën, mé lonch zirca 15 zentimetri.

Foto: Christian Koller

Tl cudejel iel da udëi de bela fotografies de fotografs profesciunisè y esperc dl ciamp.

La lia tol la ucajian nce tres La Usc de nvië a dé ite uni usservazion

de uciei, de duta la sortes, tl portal ornitho.it. Mé cun na banca dac zentrela iesen boni de savëi ulache i uciei viv y dantaldut mé cun dac y usservaziuns cunresc iesen boni

de mëter raions sot a scunanza, coche l ie bele uni fa uni tantt. Chi che uel possa zënzauter nce nes mandé la usservaziuns, d'uni sort, nce dumandes o sce abinëis n ucel


mort, a info@uciei.it. Per la lia provinziela per la nrescida y la defendura di uciei,

Iacun Prugger

JÈUNI Y JÈUNES

## Slusé n cumpania

*Dan otodi iel stat na sluseda sun Resciesa, urganiseda dai Jëuni de Sëlva y l Puliné. Na sëira drët garateda*




La grupa di jëuni y dla jëunes pra la sluseda sun Resciesa.

La sluseda sun Resciesa ie unida urganiseda da doi lies jëunes: i Jëuni de Sëlva y l Puliné.

La lies ie cunesciudes per la bela manifestaziuns che les mët a ji per

i jëuni y la jëunes de Gherdëina. Chëst iede iesen jic cun la luesa, ai 11 de fauré. Da mesa la cinch dmesdi à la grupa tëut l'ultima ferata de Resciesa per ruvé sainsom. Da dedò iesen jic deberieda de viers dla crëusc

de Resciesa, ulache n à giapà velch de bon da maië, te utia. N à pudù cri ora danter rëpes, bales y crafuncins y mo zeche de dëuc. Do cëina à i jëuni y la jëunes mo fat mpue de festa, ulache vel' un o vel' outra à



L jì dojù dl surëdl ntan la sëira de devertimënt cun la luesa.

ciantà y sunà. Deberieda iel uni ciantà cun na drëta hez.

L ie stat na sëira garateda, ulache l ie jit pea truep jëuni y jëunes, feter 50 persones de duta la valeda. Nscila dij Julia Senoner di Jëuni de Sëlva:

»L ie scialdi mpurtant a lauré deberieda cun d'otra lies dla valeda per renfurzè l liam danter i:la jëuni:es y pudëi se deverti y sté n cumpania.«

Julia Lardschneider